

LETTRE
DV ROY DE
NAVARRRE ESCRITE
à la Royne d'Angleterre,

A V E C

*Vne remonstrance sur icelle, à la No-
blesse qui le suit & tient son party.*



A PARIS,

Chez Nicolas NIVELLE, rue S. Jacques,
aux deux Colonnes.

Et Rolin THIERRY, rue des Anglois,
pres la place Maubert.

Libraire & Imprimeur de la sainte Vnion.

M. D. LXXXX.

~~AVEC~~ PRIVILEGE.



COPPIE D'VNE LETTRE

du Roy de Nauarre à la Roync d'Angleterre, dont s'est trouué chargé le Capitaine Ricqueuille pris & arresté sur le chemin de Dieppe allant exprez vers elle.

MADAME,

Combien que ie me sois par plusieurs fois excusé de ce que ie ne pouuois suiure vostre aduis, touchât le conseil que m'auiez donné de prendre la religion Romaine à fin de m'installer plus facilement à mon Royaume, sauf à prendre par apres le chemin que m'adressiez, pour remettre les choses en l'estat de reformation de l'Eglise, à quoy ie me sens appellé de Dieu pour toute la Chrestienté, comme vous l'avez esté premiere-ment pour vostre Royaume d'Angleterre: Si est-ce que si ie n'eusse donné lieu par deuant mon iugement aux opinions des Docteurs & Ministres qui sont pres de ma personne, sans doubte ou par l'apparence que ie trouuois en voz raisons, ou par le desir que i'ay tousiours eu de vous contenter, ie me fusse conduit selon voz aduertissemens: & me suis souuentefois trouué en estat que i'ay eu regret de ne l'auoir fait dès le commencement. Mais côme ie me

suis proposé d'attendre determinement souz la
 faueur du ciel & la grace de Dieu, le succez de
 ceste guerre fondee sur la liberté de l'Euangile,
 & la dispute de ma vraye & propre succellion,
 la fin m'a fait cognoistre qu'il m'a esté bié meil
 leur de n'auoir point renoncé Iesus Christ de-
 uât les hommes, lequel en cas que ie l'eusse fait
 ores que ce n'eust esté que pour vn tēps & pour
 vne bonne occasion, paraenture m'eust-il re-
 noncé & pour tousiours abandonné & mis aux
 mains des ennemis de son Eglise & des miens:
 lesquels au contraire vaincuz par ma perseue-
 rance iusques au pas de la mort il a totalement
 ruinez: & ce encor qui est vn cas admirable, &
 en quoy nous deuons cognoistre les miracu-
 leux effects de sa diuinité par le moyen de ceux
 mesmes qui sont de leur religion (desquels mō
 armee est grosse & presque toute cōplette) qui
 m'y ont si fidelement assisté à la bataille que ie
 donné hier au Duc du Mayenne, à ses estrangers
 Allemans, Espagnols, Albanois, Vvallons, Suif-
 ses & Lansquenets, & si vaillammēt & opinia-
 strement combattu que la victoire m'en est de-
 meuree graces à Dieu, lequel a porté telle fa-
 ueur à nostre cause, qu'il n'a point pēmis que
 i'aye perdu que fort peu de nostre religiō prin-
 cipalement de gens de marque, ains seulement
 ceux qui estoient Catholiques, ce que i'estime
 plustost à perte & à ruine pour mes ennemis
 que pour moy, combien qu'eux-mesmes ne le
 pouuant apperceuoir en meinent grande ioye,
 surquoy i'ay dissimulé grāde fascherie, comme
 sont contrains faire toutes personnes qui sont

appelez aux pesantes charges que nous tenõs.
 L'espere apres ceste heureuse victoire que Dieu
 m'a donnee, qu'il me continuera les graces in-
 numerables que i'ay receu de luy iournallemēt
 me faisant aduancer la reductiō de Paris, Rouē
 & de mes autres villes sans faire despense d'une
 seule vollee de Canon, pēdant que chacun est
 saisi d'espouuante, sinon à Orleans où les habi-
 tans sont fort endurcis en leur idolatrie, la ma-
 niere qui les rend plus que tous les autres opi-
 niastres à la rebellion contre leur Prince, de-
 quoy i'espere les chastier en sorte qu'ils serui-
 ront d'exemple à tout mon peuple pour luy o-
 ster par crainte (puis que ie n'ay peu par dou-
 ceur) la pernicieuse creance qu'il a eue iusques
 icy aux seditieuses exhortations des Prescheurs
 de l'Eglise Romaine. Au demeurant la pluspart
 de mes affaires ne dependent pour le present,
 Dieu mercy, que de contenter le Duc de Lon-
 gueuille, lequel m'a importuné plusque iamais
 de changer ma Religion, sans considerer qu'il
 n'y vient plus à temps, veu ce qui s'est passé, à
 quoy ie suis contrainct luy vser de quelque rē-
 mise, iusques à ce que ie voye qu'il soit bon luy
 affranchir le fault de ma resolution, & luy faire
 entendre par douceur tant que l'occasion le
 pourra permettre, à l'occasion du sieur de la
 Noüe son guide & Curateur, qu'il ne doit re-
 chercher en la conscience celuy lequel pouuant
 rechercher les autres, en donne neantmoins la
 liberté à vn chacun : & si celà ne luy suffit, ie
 luy feray cognoistre que si ie pouuois biē estre
 admonesté de plusieurs, ie ne doibs pourtant

estre corrigé que de Dieu seul, qui tient en sa main le cœur de ceux ausquels il donne la charge des Royaumes. Voyla l'estat & bon portement de mes affaires, reste vous faire entendre les particularitez de la victoire, & de vous dire les morts & prisonniers de part & d'autre, ce que i'ay remis à la suffisance de ce porteur que i'ay fait rendre certain de tout. Ce pendant ie vous remercieray tousiours de vostre ayde & bon secours, duquel ie vous suis tât redevable, que ie ne souhaite la reductiō de mon Royaume, apres l'auancemēt du regne de Iesus Christ principalemēt, que pour m'acquiter enuers vo^r des obligations auxquelles ie vous suis constitué, & pour vous faire cognoistre quand l'occasion se presentera à l'encontre de toutes personnes, que ie vous suis & seray pour iamais vn suport le plus ferme & le plus assuré que vous eussiez peu acquerir, pour n'espargner rien qui soit en ma puissance, ny ma propre personne, que tout ne soit exposé au deuoir de nostre associatiō, & fraternité de regne & de Religion, à laquelle ie prie Dieu, qu'il nous veuille maintenir malgré les ennemis de sa parolle, & vous donner

*Madame, en toute felicité ses saintes & diuines
graces, Au camp d'Iury le Ieudy 15. de Mars 1590.*

Vostre plus fidelle frere, &
parfaictement bon amy.

H E N R Y.



BRIEF ADVERTISSE-
*ment sur la precedente lettre, à la
 Noblessè qui suit le party du Roy
 de Nauarre.*

MESSIEURS, c'est à vous desor-
 mais de iuger à bon esciant le mal-
 heur où vous vous plongez, & la
 faute qu'avez commise combat-
 tant contre vostre Dieu, contre l'Eglise &
 le pais, pour celuy lequel recherchant vostre
 subuersiō & ruine, & mesmes au pris de vostre
 sang, se rit, se gosse & se plaisante de la simplici-
 té de vous autres, iusques à nommer par moc-
 querie, ceux de vous à qui sur tous autres il a
 plus d'obligation: & de ce qu'en faueur de luy
 vous estant mis auant aux coups iusqu'à y per-
 dre voz ames, & y estre taillez en pieces, dont il
 vous paye d'une feinte & simulee tristesse, &
 par sa confession propre, le faictes ensemble
 triompher de deux signalees victoires, l'une d'a-
 uoir rompu l'effort de ceux qui se sont iuste-
 ment opposez à l'iniquité de son vsurpation
 iniuste, & à ses desseins proiettez de renuerfer
 de fonds en comble la sainte Religiō Catho-
 lique: & l'autre de veoir en son seruice la dimi-
 nutiō, mesmes de ceux desquels sur toutes cho-
 ses, il craignoit & redoubtoit la vertu, la force

& proiessè, & dont il a iuré la ruine. Nous meritions pour noz pechez d'endurer vne telle escorne, pour le desordre de noz armes, & de ce qu'en la cause de Dieu nous nous aidions de l'heretique. Mais aussi sera à vous de penser ce que pourrez auoir vn iour de recompense pour ce fait, d'auoir employé vostre force pour l'impieté & l'iniustice. L'impieté est manifeste puis que le prétendu but de celuy que deffendez n'est autre, que semer & planter par tout, cōme il le couche dans ses lettres le venin de son heresie, dont il se braue, louë & vante, de la constance qu'il auroit apporté pour cest egard, & de vous piper de la sorte. L'iniustice s'y voit aussi puis qu'vsurpant dessus autrui, ce qui ne luy appartient de droit, il n'a trouué meilleur support qu'aux armes fortes & puissantes de ceux qui pour leur vray deuoir & l'ancienne vertu de leurs peres estoient tenuz de le destruire. O parole tres-veritable du fils de Dieu, quand il disoit, *Que les enfans des tenebres sont plus rusés & aduises au maniement de leurs affaires, que ne sont pas ceux de lumiere*. Vous auez recueilly le serpent, qui sans vous estoit abandonné, roide de froid gisant sur terre sans argent sans force & moyës, qui depuis eschauffé de vous, & remis en force & vigueur, vous chassera par son poison hors de voz biens & voz maisons. Ainsi Ioathā qui seul estoit resté du massacre d'Abimelech meurtrier de ses septante freres predict aux bourgeois de Sichem, qui auoient receu pour leur Roy ce patricide abominable, que leur ruine en dependoit, comme en effect ainsi aduint, vsant d'une fable

Luc 16.

Isa. 9.

fable à propos & gentille similitude des arbres, lesquels ayās refusé pour Prince l'oliue & la vigne, qui tous deux portoient vn bon fruit, aymerent mieux prendre la ronce, qui depuis fut le boutefeux pour les brusler entierement. Si vous ne plaiguez les ruines auancees par vous mesmes de noz Temples & de noz Autels, de tant de Martyrs dont le sang bouillonne, prest de sortir hors, & se respendre deuant Dieu, au moins plorez dessus vous autres, plorez voz femmes & enfans, qui par le iugement de Dieu beuront la faute de leurs peres. Car vous mangez la grappe verte dont leurs dents serōt agacees. Nous auons beu le hault du gobelet, mais auisez que n'en beuuez la fondriere. Il y en a assez pour tous, le calice est en la main de Dieu du vin pur de son ire & courroux. Il le verse de l'vn à l'autre, mais la fondriere n'en est hors. Tous les pecheurs en tasteront, & vous mesieurs plus que les autres. Pensez quelle en est l'amertume. Pensez cōme la main de Dieu plus elle tarde, plus est pesante. Et quelle difference il y a d'estre Chrestien comme enfans, comme auoüons d'auoir esté, ou comme iurez ennemis dont les tristes euenemens se preparent dessus voz testes.

Psal. 74.

NE vous trompez si pour vn temps par vostre moyē la victoire est demeuree à l'ennemy, victoire Cadmee s'il en fut onc, qui vous vainc & desfaiēt vous mesmes, qui vous destruiēt & vous ruine. Les iugemens de Dieu sont grāds. Il se sert de ses ennemis pour executer sa iustice contre ceux qu'il veut chastier, afin de les sau-

uet apres. Mais en la queüe gist le venin. Le retour est trop dangereux pour y aller teste baissée, & pensant enfermer les hommes, s'enfermer & liurer soy mesme en la main puissante de Dieu, iuste vëgeur des affligez, & qui sçait rendre abondammët la pareille à tous orgueilleux & mespriseurs de son saint nom. Pensez de dessiller voz yeux, & de ne faire plus auant, qu'un abyisme en attire vn autre. Car pourquoy faute dessus faute ? Qu'elle plus miserable seruitude, que se plaire dans le borbier, pour s'y plonger de plus en plus ? Si l'Eglise, si la patrie, à qui deuez ce que vous estes, quoy que toute rouge & sanglante des coups que luy auez donnez vous tend ce neantmoins les bras, vous appelle de voix dolente, mais charitable toutesfois, pourquoy ne l'exaucerez vous ? Pourquoy ne retournerez vous ? Pourquoy iouërez vous à credit de vous perdre vous & voz ames ? Bien que grâde soit vostre faute, quel subiect de desesperer ? Mesmes au tēps de penitence ? Quel subiect ainsi qu'un Cain, vn ludas meurtrier & perfide, perdre l'espoir de son salut & de se deffaire soy-mesme ? Manasses n'a-il pas trouué, quoy que meschât il eust esté, meurtrier, sorcier, incestueux, persecuteur & idolatre, lieu de salut & penitence, quand il se conuertit à Dieu ? David disant son *Peccavi* ne fut-il pas receu en grace ? Saint Paul n'est-il pas reuenu ? Saint Pierre n'a-il pas ploré & rentré en son premier estat ? Vn Zachée, vn S. Matthieu quittant leur premiere auarice n'ont-il pas esté des premiers entre les serui-

teurs de Dieu? N'est-ce pas la voix de Dieu, quand il disoit par son Prophete, conuertissez vous à moy & ie me conuertiray à vous? Cessez *Esa. 1.* deormais de mal faire, & apprenez à faire bien, lavez vous, soyeZ nets, osteZ le mal de voZ pensees de deuant mes yeux, quereZ iugement, releueZ celuy qui est foulé, reuangeZ l'orphelin, deffendeZ la vefue. VeneZ maintenant & entrons en cause, quand voZ pecheZ seroient rouges cōme esscarlatte, si seront ils blanchis cōme la neige, & quand ils seroient rouges comme vermillon, ils seront blancs comme la laine. N'est-ce pas ce que dit S. Paul, que celuy qui a employé ses *Rom. 6.* mēbres pour seruir à iniustice, les employe par cy apres pour seruir à la iustice? Et quel plus grand honneur peut estre que quitter le mauuais party pour prédre le saint & le iuste, puis que celà est l'effect entier de la venuë de Iesús Christ? Car pourquoy est-il mort pour nous, sinon pour nous faire mourir à peché? Et pourquoy resuscité, sinō pour nous resusciter à vie? C'est chose humaine que de pecher, mais diabolique de perseuerer, car ainsi l'enseigne l'Eglise. C'est l'esperoir que nous auōs de vous, que croyant Dieu, vous nous croirez: disant Dieu par Ezechiel, la maison d'Israël ne te veut es- *Ezech. 3.* couter pour ce qu'elle ne m'escoute moy-mesme. Ce que si autrement ne peut estre, sinō que Dieu vous touche dans le cœur: c'est en quoy nous le supplirons & redoublerōs noz prieres. Mais vous, Messieurs, aidez vous. Pensez à ce que deuez estre. Pensez à ceste eternité. Et si celà ne vous conuie, au moins pensez & repensez de combien vous estes deceuz de coucher si

gros pour celuy, pour lequel exposant voz vies
voz biens, voz moyens & voz ames, ne vous
payera en fin de compte, que d'une baye & de
risée, & de l'insigne impieté, que s'aidant de
tous vous autres comme le singe de la patte du
chat pour prendre les chastaignes au feu, il ba-
stira sur voz ruines.

Vous vous trompez aux fondemens que
vous posez à vostre cause, sur lesquels par voz
discours mesmes qu'avez tenuz à vn Legat dõt
deuiez redoubter l'oreille pour ne rien dire de
leger, vous confessez auoir basty, cest iniuste
port de voz armes. Il faut dites vous prẽdre vn
Roy tel qu'il plaist à Dieu le donner, bon ou
meschant, iuste ou iniuste, Catholique ou he-
retique, deuotieux ou infidele sans en rien se
formaliser. Et puis il ne faut dictes vous con-
traindre ou forcer l'heretique pour le fait de la
religion. Car ce sont là voz arboutans, c'est la
iustice de voz armes: sont les discours & beaux
propos de ces Cameleõs d'heretiques qui chã-
gent de toutes couleurs: sont les maximes &
principes, sur lesquels sans penser à vous, osez
coucher de vostre reste.

Mais si ce premier point a lieu, pourquoy
donc vous bandez vous contre le Roy Charles
dixiesme? Dieu ne vous l'a-il pas doné? Le droit
ne luy est-il pas acquis? Le procez est-il pas in-
gé? les Estats l'ont-ils pas decisi? Quelle plus
iniuste manie, qu'une maxime generale soit au
profit de l'heretique & au rebut du Catholi-
que? Mais considerons de plus pres la qualité
de ce principe. Car quels Rois sont ce que

Dieu donne? Me direz vous estre ceux-là qui de force se font les maistres, ou bien qui y viennent de droict? Je croy que ne vous ferez ce tort de dire que soient les premiers: car l'Escriture y contredit, qui dit, *Ils courroient, & ie ne les enuoyois* Hier. 23. pas. Et Dieu n'est autheur d'iniustice, pour fauoriser & porter, ce que souuēt il permet estre. Et si permettre est enuoyer, la reigle seroit par trop rude, de dire qu'il ne fust loisible d'y resister aucunement. Car Dieu permet bien les Lyons, les Loups, les Tygres & les Ours, les Dragons, Serpens & Crapaux, & autres bestes furieuses ou dangereuses par leur venin. Mesmes souuēt dit l'Escriture, qu'ils sont enuoyez de Dieu: le mesme est-il de tous larrōs, voleurs & guetteurs de chemins. Et qui sera-ce de vous autres, qui les vueille endurer pourtant? qui ne dresse aux bestes farouches, des lacs, des pieges & fillets? qui ne coure sus aux voleurs, ne les pourchasse à coups d'espee s'il faiēt ce qui est de son deuoir, & s'il n'est de leur party mesme, pour en depeschier tost le monde? N'est-ce pas le faiēt de Noblesse, que de deliurer le pays de male beste & male gent? Dieu permet bien les maladies, les catharres & fluxions, les blessures & coups dangereux. Qui sera ce pourtant de vous qui n'appelle le Medecin, qui ne recerche en diligence les plus experimētez Chirurgiens pour se deliurer de douleur? Dieu permet que les ennemys viennent souuent courre sur nous, si donc il faut les endurer, dequoy seruira la Noblesse? Pourquoi les villes réparées? A quel vsage employera-on les munitiōs & les armes?

Dieu permet souuent que les Diables faississent les hommes au corps, & qui sera celuy pourtāt qui ne cherche les exorcismes?

QU E si donc il ne faut pēser qu'aucun Roy soit donné de Dieu, sinon que le droict l'y appelle, il faudra lors premierement sçauoir qui c'est qui a le droict, auant que de s'opiniastrer à le receuoir & seruir. Et puis si nous en venons là, le poinct sera d'estre esclarcy si vn heretique y a droict, ou s'il est capable de l'estre. Ce que si homme ne peut dire, dequoy sert plus de tant plaider? Pourquoi ne mettez vous arriere l'usurpateur que maintenez? Car veu qu'il y a double droict, le droict diuin, & le droict humain, lequel des deux en bonne foy me direz vous marcher deuāt? Car dire que soit le droit humain, il n'y a aucune apparence: celà seroit par trop impie sans propos & sans iugement, de mettre l'ombre deuant le corps, le ruisseau deuant la fontaine, la branche deuant le tronc, les rayons deuant le soleil, l'ouurage deuant l'ouurier, & la creature auant son Principe. Le droict diuin est la source dōt tout autre droict se deriue. C'est le niueau où il se mesure, c'est la regle où il se cōpasse, l'alābic où il se decoulle, c'est la fournaise où il s'affine, la pierre de touche où il s'esprouue, le patron où il se cōforme, le fondement sur lequel il pose le siege du dernier ressort qui casse & annulle, & qui deroge à tout autre droict quelcōque, Et fuisse le droict de nature comme du fils enuers le pere, & du pere enuers les enfans. Disant le fils de Dieu en

Math. 23. l'Euangile, Ne vous nommez point de pere sur terre:

*Car vous n'auēz qu'un pere au Ciel. Et ne soyeZ point
appelleZ maistres: Car vous n'auēz qu'un maistre au
Ciel. Et ailleurs, Qui ayme son pere ou sa mere, sa* *Muh. 10.*
*femme, ses freres, ses seurs, ses enfans, ses biens plus que
moy, celuy là n'est digne de moy. Et qui est plus que
tout celà, il veut que pour l'amour de luy on
quitte ce qui est le plus engraue en nous de
tout le droict de nature, qui est de l'aymer, se
sauuer & contregarder soy-mesme. Si quelqu'un* *Luc. 14.*
*(dit-il) vient à moy & il ne hait parēs & amis, voire
mesme sa propre vie, il ne peut estre mō disciple. Reste
donc veoir par quel droict vn heretique peut
pretendre d'auoir part à quelque couronne,
pour commādet sur les Chrestiens. Car si vous
alleguez le sang & le droict de succession, qui
ne sçait que ce droict n'est qu'humain, veu que
celà est variable, & n'est de mesme en tous en-
droicts? Si donc le droict diuin precede & de-
roge à tout autre droict, & par ce mesme droit
diuin qui ne nous oblige à rien moins qu'à
damnation eternelle, nous sommes prohibez
& interdits de recognoistre vn heretique pour
Roy par dessus les Chrestiens, quel droict pre-
tendra l'heretique entre gens qui cognoissent
Dieu, qui ont receu son caractere au sainct Sa-
crement de Baptisme, pour paruenir à la cou-
ronne? Car pour sçauoir ce droict diuin l'Escri-
ture y est trop expresse. Dieu deffend dans le
Deuteronomie, de choisir vn Roy estrāger, qui* *Deut. 17.*
*ne soit du nombre des freres. De peur ce disoit
Lucifer Euesque de Calaris, escriuant contre* *Lib. 1. pro*
Constāce Arrien, approuué par le grand Atha- *Ath.*
nase & autres saincts Confesseurs, banniz du

temps de la persecution, qu'il n'attire le peuple à sa secte. Raison valable & pertinente, pour l'impossibilité qu'il y a que sous vn Roy heretique le peuple continuë d'estre Catholique.

Ecl. 10. Tel qu'est le gouverneur de la cité (dict l'Escripture) tels seront les habitans. De sorte que de desirer ou consentir vn Roy heretique, n'est autre chose que de coucher de sa Religion, & l'exposer au hazard d'une ruine entiere & y donner consentement. Pourtant dict fort bien S. Gregoire

Orat. in Athan. Qui contraria fide amplectitur aduersarius quoque in throno celsi debet.
3. Reg. de Nazianze, que qui embrasse vne Religion cõtraire doit estre aussi estimé ennemy de la Couronne. L'experience nous apprend trop ce que peuuent les Rois, pour desbaucher vn peuple, non seulement en ce qui s'est passé sous Ieroboam, qui fit pecher Israël, ains aussi es Royaumes & Provinces voisines d'Angleterre, Escosse, Germanie, Dannemarc, Suede & Boëme. Et ce Henry pretendu quatriesme, declare assez son intention, soy disant en ceste belle lettre appellé de Dieu, pour la reformation de l'Eglise, c'est à dire pour la ruiner, & y planter l'infidelité, qu'il qualifie l'Euangile. Et pour ne douter de la façon dont il pretend s'y gouverner, n'oublie d'alleguer son Patron, qui est la Royne d'Angleterre, à qui la lettre est adressée, car ainsi vn Barbier rect l'autre. Que si tous Catholiques sont tenuz de droit diuin de conseruer la Religion & en combattre les ennemis, comment receuront ils pour Roy celuy qui en a iuré la ruine? Le Roy de France est tres-Christien, l'heretique n'est pas Christien, & nous tiendrõs pour nostre Roy vn infidele & heretique? Les Rois
 de France

de France sont sacrez d'une sainte huile en-
 uoyee du ciel, & nous doubtons que de droict
 diuin il faille rebuter celuy qui se mocque de
 l'onction? Saint Remy premier consecrateur *Li. 1. hist.*
 & pere des Rois de France, ordonne par son *Rhémois.*
 testament que lon chasse hors par sentence dif-
 finitiue des Euesques, tant de l'Eglise que du
 Royaume, le Roy de France qui attenteroit à
 ruiner & spolier l'Eglise, & que sur luy on re-
 double par toutes les Eglises les maledictions
 de Iudas cōtenuës au Pseaume cēt huitiesme,
 & entre autres celle-cy. *Et Episcopatum eius ac-*
cipiat alter, qu'une autre prenne son autorité. *Psal. 108.*
 Quel motif a ce saint Euesque, de faire vn iu-
 gement si austere, sinon qu'il se voyoit fondé
 sur ceste pierre ferme, dure, & sur ce roc de
 droict diuin? N'est ce pas la mesme occasion
 pour laquelle disoit Lucifer à Cōstance Arriē,
Primo loco Christianum te esse oportuerat? Outre ce
 qui est en Esaye, *Gens & regnum quod non serui-*
rit tibi, peribit, lesquelles paroles s'adressent à *Esa. 6.*
 Hierusalē, c'est à dire l'Eglise Catholique: car
 vn Royaume ne peut seruir Dieu, si le chef n'est
 Catholique (car le seruice de l'heretique est a-
 bominable deuant Dieu) qui doute que de
 droict diuin tout Roy entre les Chrestiens est
 tenu d'estre Catholique? Considerce mesme la
 menace qui est d'une ruine entiere, au cas qu'on
 ne serue à l'Eglise?

Et voilà quant au droit diuin qui chasse &
 exclud l'heretique, quād bien d'ailleurs il y eult
 droit de l'humain. Je n'en parle plus, car la ma-
 tiere est trop vuidee: trop de gens sçauans &

lettrez en ont prononcé leur aduis, & ceux mesmes qui ont esté des plus auant en vostre cause. Qui nous red plus esmerueillez que contre vostre maxime mesme vous approuuez l'inniquité de celuy qui tient prisonnier celuy que Dieu vous a donné pour Roy & Prince naturel, & pour la deffense duquel vous estes tenuz d'employer voz moyés, voz biens & voz vies.

Et quant à vostre autre principe, ne dictes plus que l'heretique ne doit estre contraint par force, à se ranger & conuertir à l'Eglise des Catholiques, ce point a esté trop battu pour en vouloir doubter encore. La foy est libre dites vous. Ouy mais autre est la liberté qui exclud la necessité, & autre est la liberté qui exclud l'obligation. Car nul n'est iuste qui ne veut, si ne laissera-il pourtant d'estre tenu de l'estre. On pend les volleurs & larrons, on brise & rompt les meurtriers, pourquoy celà, sinon d'autant qu'ils sont tenuz de n'estre tels, encore que leur franche volonté ne puisse en rien estre contrainte? & quoy que la necessité n'y soit, l'obligatiō n'y laisse d'estre? Pensez le mesme du peché le plus grand, qui est l'heresie. Car quoy qu'on ne puisse forcer la liberté de conscience (qui n'est autre chose sinon la liberté d'estre meschant) si ne laissera-on pourtant de la ranger à la raison, de la chastier & punir, de contraindre veulent ou non ceux qui en seroient infectez d'ester à la profession qu'ils auroient iuré au Baptisme. Que s'ils resistent par la force, s'ils sont maistres de la campagne, si la iournee leur demeure, celà ne les iustificera non plus

que iadis les escumeurs de mer qui estoient du temps de Pompee, ou les brigans & les voleurs dont Sertorius fut le chef, ou les bannis de l'Italie ou les bandoüillers de Bearn, ou des creux du Mont Pyrenée, ou les armées d'Attila qui s'appelloit fleau de Dieu, ou les troupes innombrables des Turcs, Sarrazins, & Barbares, quand ils ont eu du meilleur, Dieu le voulant pour nous punir, qui ne les rends meilleurs pourtant, ny ne faiët leurs actions iustes.

Et quant à ce que vous insistez de ne contraindre l'heretique, l'escriture n'en parle ainsi, qui commande de mettre à mort celuy qui suit de nouveaux Dieux, ou bien qui n'obeit au Prestre. Helie, Iosias & Iehu, n'en passeroient par ce qu'en dites, qui ont teinct & rougy leurs mains dedans le sang des faux Prophetes. L'escriture qui les appelle du nom de ceux qu'il faut tuër, ou quoy que soit exterminer. *Donnez Math. 7.*
vous de garde (dit-elle) de ceux qui viennent à vous en habits de brebis, & dedans sont loups rauissans. Et ailleurs, Celuy qui n'entre par la porte mais monte par Ioan. 10.
vn autre endroict, celuy-là est larron & volleur, car les loups larrons & volleurs, sont ordinairement mis à mort. Tantost les comparans au chancre où on doit mettre le fer chaud, monstre com- 2. Tim. 2.
 me il les faut traicter. Les saintes Loix des Empereurs qui ont bruslé les heretiques, qui les chassent & les bannissent, Les Conciles qui ont banny Arius le flambeau de l'Eglise, & qui ont faiët brusler Iean Huz, Alexius Comienus Empereur, qui fit brusler Basile autheur de l'he-

refie des Bogomites, Maxime l'Empereur qui fit mourir Priscillian heresiarque, les Donatistes en Afrique, & en France les Albigeois du temps de saint Dominique, & du temps de saint Bernard les insensez Adamites, que lon brusloit à grâs monceaux, Calvin mesme bruslant Seruet & les Arrests tant de luy que de ses complices à chastier les heretiques, ne nous apprenent autre chose.

E T que sera-ce de vous autres qui supportez les heretiques? qui combattez pour l'heretique? pour celuy que vous n'ignorez auoir protesté de planter la doctrine des heretiques? Qui se vante de n'espargner sinon le sang des heretiques? & qui n'expose au fort des coups, sinon le sang des Catholiques? N'est-il pas dict que ceux qui font le mal & ceux qui y consentent, (combien à plus forte raison ceux qui y donnent ayde & confort?) sont en mesme predicament, & par le iugement de saint Paul sont estimez dignes de mort?

P E N S E Z Messieurs, ce que vous estes. Pensez Messieurs ce que vous faictes. Et puis que c'est à vostre damp que toute la farce se ioüe, & que pensant vous auancer, vous attisez dessus vous mesmes vne ruyne ineuitable, si en faisant ce que vous faictes, autre ne peut estre l'effect de voz si furieuses armées, que d'embrafer tout le public du feu qui vous consommera, si ce n'est pour l'amour de Dieu, ny de vostre pauvre patrie, au moins que ce soit pour vous mesmes que vous retirez vostre épingle. Ostez

ce bandeau qui vous bouche, qui vous aveugle
& ferme les yeux. Brief receuant en bonne part
cest aduis, qui ne peut seruir à personne tant
qu'à vous mesmes, si vous voulez ne nous ay-
mer, au moins souffrez que lon vous ayme.

F I N.



Extrait du priuilege.

PA R priuilege donné & octroyé, par Messieurs du Conseil general de la sainte Vnion des Catholiques, A Nicolas Niuelle, & Rolin Thierry, Libraire & Imprimeur, Il leur est permis d'imprimer tout ce qui peult cōcerner l'Estat public & affaires de France, & ce qui sera ordonné & procedera d'iceluy Conseil. Et sont faiçtes defences à tous autres Libraires & Imprimeurs, de les imprimer ou faire imprimer, ny exposer en vente, sur peine de confiscatiō des exemplaires, & d'amende extraordinaire, ainsi que plus à plein est contenu par ledict Priuilege. Donné à Paris le 18. Auril, 1589.

Signé,

SENAVLT.